

# KERATAN AKHBAR

TARIKH : 29 JUN 2024  
AKHBAR : BERITA HARIAN  
MUKA SURAT : 24

## Pengekalan bukti pengurusan ekonomi berhemat kerajaan

S&P, Fitch kekal penarafan kredit berdaulat Malaysia

# Pengekalan bukti pengurusan ekonomi berhemat kerajaan

Anwar yakin kemampuan negara capai pertumbuhan julat sasaran rasmi tahun ini

Oleh Alzahrin Alias  
zahrin@bh.com.my

Pengekalan penarafan kredit berdaulat Malaysia dan tinjauan ekonomi positif oleh S&P Global Ratings (S&P) dan Fitch Ratings (Fitch) menjadi bukti kepada pengurusan ekonomi berhemat kerajaan dan agenda reformasi Ekonomi MADANI sudah membuahkan hasil yang baik.

Perdana Menteri, Datuk Seri Anwar Ibrahim, berkata usaha ini merangkumi reformasi menyeluruh institusi untuk meningkatkan mudah cara perniagaan dan daya saing serta penerusan pelaksanaan projek dan pembaharuan

dasar di bawah Pelan Induk Perindustrian Baharu 2030 (NIMP 2030), Pelan Halatuju Peralihan Tenaga Negara (NETR) dan Kajian Separuh Penggal Rancangan Malaysia Ke-12 (RMK-12).

"Dengan pasaran buruh memberangsangkan serta pertumbuhan menggalakkan dari segi perdagangan dan pelaburan memacu pertumbuhan Keluaran Dalam Negara Kasar (KDNK) suku pertama 2024 sehingga melepasi jangkaan, kerajaan yakin dengan kemampuan negara untuk mencapai pertumbuhan dalam julat sasaran rasmi sebanyak 4.0 hingga 5.0 peratus pada 2024," katanya dalam satu kenyataan, semalam.

S&P dan Fitch Fitch mengekalkan penarafan kredit berdaulat Malaysia masing-masing pada A- dan BBB+, selain menetapkan tinjauan 'stabil'.

Pengesahan kedua-dua agensi ini mencerminkan keyakinan berterusan oleh pemegang taruh antarabangsa dalam prestasi pertumbuhan negara yang kukuh dan berdaya tahan, meskipun permintaan luaran yang mencabar ditambah dengan peningkatan

konflik geopolitik global.

Melangkah ke hadapan, Anwar yang juga Menteri Kewangan berkata, kerajaan kekal komited dalam memastikan kemampuan kewangan awam dengan mematuhi trajektori konsolidasi fiskal yang konsisten.

Beliau berkata, defisit fiskal yang menirus kepada 5.0 peratus pada 2023 dijangka akan menyusut lagi kepada 4.3 peratus pada 2024.

Katanya, dalam jangka sederhana, kerajaan menetapkan defisit fiskal untuk berada pada paras 3.0 peratus seperti termaktub di dalam Akta Kewangan Awam dan Tanggungjawab Fiskal 2023 yang berkuat kuasa pada 1 Januari 2024.

"Ini selari dengan sasaran fiskal di bawah kerangka Ekonomi MADANI untuk merealisasikan kemampuan fiskal dan tatakelola yang baik," katanya.

### Pelaksanaan reformasi subsidi

S&P menggariskan Malaysia bakal menjadi penerima manfaat utama daripada ledakan industri semikonduktor global yang dipacu pengkomputeran kecerdasan buatan (AI).

S&P juga berpandangan kelestarian pertumbuhan ekonomi dan pelaksanaan reformasi subsidi pukal menjadi faktor penting dalam pengukuhan kewangan awam negara.

Malah, kestabilan politik mutakhir ini memudahkan pengubalan dasar yang menjurus kepada pelaksanaan pembaharuan ekonomi dan konsolidasi fiskal.

Fitch pula mengunjur pertumbuhan KDNK Malaysia akan melonjak sebanyak 4.4 peratus pada 2024 dan 4.5 peratus bagi 2025, lebih tinggi daripada 3.6 peratus pada 2023.

Trend ini didokong oleh permintaan domestik yang berdaya tahan dan pelaburan dalam sektor pembuatan, kata firma penarafan itu.

Tambahnya, ia menjangka perbelanjaan domestik akan mendapat limpah daripada pasaran buruh yang meningkat, program bantuan tunai dan pengeluaran wang persaraan.

Selain itu, Fitch menjangka pengeluaran pembuatan dan eksport akan mengembang dengan pemulihan permintaan luaran untuk barang elektronik.